

Na osnovu člana 17. Zakona o Vijeću ministara Bosne i Hercegovine ("Službeni glasnik BiH", broj 30/03, 42/03, 81/06, 76/07, 81/07, 94/07 i 24/08), a u vezi sa članom 1. Zakona o dopunama Zakona o carinskoj tarifi Bosne i Hercegovine ("Službeni glasnik BiH", broj 32/04) i čl. 1. i 2. Zakona o izmjenama i dopunama Zakona o carinskoj tarifi Bosne i Hercegovine ("Službeni glasnik BiH", broj 76/06), Vijeće ministara Bosne i Hercegovine, na 69. sjednici održanoj 18. decembra 2008. godine, donijelo je

## **ODLUKU**

### **O UTVRĐIVANJU KOLIČINA TARIFNIH KVOTA**

#### **Član 1.**

##### **(Djelokrug primjene)**

(1) Ovom Odlukom utvrđuju se količine tarifnih kvota koje se primjenjuju umjesto količina tarifnih kvota koje su otvorene Zakonom o carinskoj tarifi Bosne i Hercegovine ("Službeni glasnik BiH", br. 1/98, 5/98, 7/98, 22/98, 31/02, 32/04, 48/05 i 76/06).

(2) Ova Odluka ne odnosi se na tarifne kvote otvorene prema Privremenom sporazumu o trgovini i trgovinskim pitanjima između Bosne i Hercegovine i Evropske zajednice.

#### **Član 2.**

##### **(Količine tarifnih kvota)**

Količine tarifnih kvota utvrđuje se kako slijedi:

Redni broj	Tarifna oznaka	Naziv	Količina kvote	Stopa carine
1	0202 30 90 00	Goveđe meso, smrznuto, bez kostiju, ostalo	1.273 tone	0

#### **Član 3.**

##### **(Omjeri)**

(1) Korištenje uvoznih tarifnih kvota iz člana 2. ove Odluke veže se za otkup domaće primarne proizvodnje u omjeru 1:1 (za 1 kg otkupljene žive mjere junadi ili goveda od domaćih proizvođača odobrava se 1 kg uvozne predmetne kvote).

(2) Korištenje uvoznih tarifnih kvota za potrebe robnih rezervi u entitetima i Brčko Distriktu Bosne i Hercegovine ne podliježe obavezi otkupa od domaćih primarnih proizvođača.

(3) Prerađivači mesa koji su u isto vrijeme registrirani i kao proizvođači tovnog materijala (junadi ili goveda) mogu sopstvenu proizvodnju prikazati kao otkup na domaćem tržištu pod istim uvjetima koji su regulirani članom 3. stav 1. ove Odluke.

#### Član 4.

##### **(Domaći primarni proizvođači)**

(1) Pod domaćim primarnim proizvođačem u smislu ove Odluke podrazumijeva se lice registrirano u Bosni i Hercegovini koje se bavi proizvodnjom proizvoda navedenih u članu 3. ove Odluke, koji imaju bh. porijeklo i organizatori proizvodnje, preduzeća ili zemljoradničke zadruge koje su registrirane za otkup stoke za sopstvenu preradu, ili prodaju iste za daljnju preradu.

(2) Lice registrirano u Bosni i Hercegovini znači, u slučaju fizičkog lica, svako lice koje ima prebivalište u Bosni i Hercegovini, a u slučaju pravnog lica ili udruženja, to je svako lice koje u Bosni i Hercegovini ima registrirano sjedište ili stalnu poslovnu firmu.

(3) Smatra se da, u slučaju živih životinja junadi ili goveda, ove životinje imaju bh. porijeklo ako su životinje cjelovito dobijene ili životinje bez porijekla čijem otkupu je prethodilo vrijeme tovljenja od najmanje tri mjeseca.

(4) BiH porijeklo živih životinja se dokazuje dokumentacijom Agencije za označavanje životinja Ureda za veterinarstvo Bosne i Hercegovine i dokumentacijom koja prema BiH propisima mora pratiti promet ovih proizvoda.

(5) Otkup domaće primarne proizvodnje carinskim organima dokazuje se izjavom da je izvršen odgovarajući otkup domaće proizvodnje, kojim otkupljivači pod materijalnom, moralnom i krivičnom odgovornošću potvrđuju vjerodostojnost datih podataka, u periodu u kojem se koriste tarifne kvote u omjerima predviđenim ovom Odlukom. U izjavi je potrebno navesti naziv i sjedište domaćeg primarnog proizvođača za obveznike PDV, ime i prezime proizvođača, adresa, jedinstveni matični broj za proizvođače koji nisu registrirani kao obveznici PDV, vrste otkupljenih proizvoda, količine, vrijednosti i druge podatke po zahtjevu carinskih organa. Uz izjavu je potrebno priložiti odgovarajuću komercijalnu i finansijsku dokumentaciju kojom se dokazuje izvršeni otkup, a koja treba da sadrži fakturu domaćeg proizvođača obveznika PDV ili račun otkupnih blokova za poljoprivredne proizvođače (farmere) koji nisu registrirani kao obveznici PDV, izdatih na osnovu propisa Bosne i Hercegovine koji reguliraju ovu oblast, kao dokaz o izvršenoj žiralnoj uplati po fakturi ili otkupnom bloku.

(6) Uz izjavu je potrebno također priložiti potpisanu i ovjerenu potvrdu veterinarskog inspektora ili ovlaštenog veterinara od strane ovlaštene institucije iz koje dolazi, o izvršenom klanju otkupljene stoke u registriranoj klaonici.

(7) Ukoliko se tarifne kvote koriste za potrebe robnih rezervi entiteta ili Brčko Distrikta Bosne i Hercegovine, carinskim organima je potrebno podnijeti pismenu potvrdu resornog ministarstva entiteta ili Vlade Brčko Distrikta Bosne i Hercegovine da se radi o uvozu za potrebe robnih rezervi.

## Član 5.

### **(Stavljanje robe u slobodan promet)**

(1) Stavljanje robe u slobodan promet koja se svrstava u tarifnu oznaku navedenu u članu 2. ove Odluke uz korištenje tarifnih kvota, osim robe koja se uvozi za potrebe robnih rezervi, podliježe odredbama čl. 198. do 207. Odluke o provedbenim propisima Zakona o carinskoj politici Bosne i Hercegovine ("Službeni glasnik BiH", broj 63a/04).

(2) Povoljnost korištenja tarifnih kvota odobrava se samo nakon predočavanja carinskim organima dokumenata iz člana 4. st. (5) i (6) ove Odluke, o kojima zavisi odobravanje nulte carinske stope. Dokument se mora priložiti prije nego se iskoriste tarifne kvote.

(3) U skladu sa članom 164. st. 1. i 2. Odluke o provedbenim propisima Zakona o carinskoj politici Bosne i Hercegovine dokument iz stava (2) ovog člana može se predočiti i nakon datuma isteka roka za koji je bilo predviđeno korištenje tarifnih kvota, pod uvjetom da je prijava, koja se odnosi na tu robu, prihvaćena prije tog datuma.

## Član 6.

### **(Upravljanje tarifnim kvotama)**

Upravljanje tarifnim kvotama iz ove Odluke vrši se u saglasnosti sa odgovarajućim odredbama Odluke o provedbenim propisima Zakona o carinskoj politici Bosne i Hercegovine.

## Član 7.

### **(Garancija)**

(1) Radi osiguranja plaćanja uvoznih dažbina polaže se u svim slučajevima uvoza uz korištenje tarifnih kvota iz ove Odluke, osim u slučajevima uvoza roba za potrebe robnih rezervi, garancija poslovne banke.

(2) Garancija iz stava (1) ovog člana se ne može razdužiti do okončanja postupka stavljanja robe u slobodan promet, odnosno dok se carinski organi ne uvjere da je uvozno

meso korišteno samo za proizvodnju proizvoda iz tarifnog broja 0210 i za proizvode iz Glave 16. Carinske tarife BiH koji su kuhani na temperaturi u centru preko 70°C ili sušeni sa kalom sušenja preko 25%.

Član 8.

**(Prestanak važenja ranije donesenih odluka)**

Stupanjem na snagu ove Odluke prestaje važnost Odluke o utvrđivanju količina tarifnih kvota i omjera za otkup domaće primarne proizvodnje za koje se veže korištenje tarifnih kvota za uvoz mesa ("Službeni glasnik BiH", broj 13/08).

Član 9.

**(Stupanje na snagu)**

Ova Odluka stupa na snagu osmog dana od dana objavljivanja u "Službenom glasniku BiH", a primjenjivat će se od 1. januara 2009. godine.

---

VM broj 230/08  
18. decembra 2008. godine  
Sarajevo

---

Predsjedavajući  
Vijeća ministara BiH  
dr. **Nikola Špirić**, s. r.

---